



1001 Masalah

Abu Al-Mokhtar Sedia Menjawab..

Setelah membayar income tax (cukai pendapatan)
tak payah berzakat?

-----*

“Seorang awam” telah mendatangkan suatu pertanyaan yang tersebut di bawah ini. Pertanyaan itu demikian: “Tuan - di dalam perjumpaan Hari Raya yang baharu lalu yang telah diadakan “di al-Rabitah al-Arabiyah” di Sringgon Road Singapura Tuan As-Syed IbrahimBin Umar Al-Saggof telah bangun berucap di antara lain di dalam ucapan itu demikian maksudnya – “menurut merajaah yang saya fahamkan daripada Mazhab Hanafi bahawa orang-orang kaya Islam tidak payah memberi “zakat harta” kerana mereka telah dikenakan “cukai pendapatan” oleh kerana cukai pendapatan itu akan terpulang kepada “Jabatan Kebajikan Masyarakat” yang bererti faedahnya akan terpulang kepada orang yang fakir miskin juga” – begitulah maksudnya lebih kurang kehendak ucapan itu. Saya harap kiranya tuan sudi menjelaskan soal ini menurut ajaran Islam yang sejati kerana sepanjang yang saya ketahui hanya seperseratus daripada orang-orang Islam yang menderita yang mendapat faedah daripada Jabatan Kebajikan Masyarakat yang tersebut, tak usahkan asnafnya yang delapan itu.”

Jawabnya – sebelum menjawab kepada soal ini kita patut mengenalkan lebih dahulu bahawa as-Syed Ibrahim Bin Umar al-Saggof itu ialah beberapa tahun lamanya menjadi Yang Di-Pertua Jemaah ad-Dakwah al-Islamiyah semenjak dari ditubuhkan sehingga pada tahun yang lalu dan menjadi juga

Yang Di-Pertua Majlis Islam Penasihat Kerajaan. Ia seorang hartawan yang terkenal dan juga seorang yang dipandang ada mempunyai ilmu agama Islam yang tinggi yang pada suatu masa khabarnya ia adalah seorang hafiz Quran dan seorang anak mendapat pelajaran juga ilmu agama di Mekah.

Masalah yang dijadikan pertanyaan ini, menurut pendapatan kita ialah suatu masalah yang kerap kali terbiar dan tidak berapa diendahkan tujuan-tujuannya pada masa ini sehingga di dalamnya kerap kali didatangkan helah-helah bagi melepaskan tanggungan seseorang bagi membayar atau menunaikan fardu zakat itu terutamanya di dalam perkara zakat harta.

Menurut penyiasatan kita bahawa nampaknya, jika benar pertanyaan seseorang awam ini as-Syed Ibrahim harus menurut pendapatan kita telah mengambil misal ke atas yang demikian ini pada mazhab Hanafi ialah daripada “apabila seseorang raja (Islam) yang zalim telah melakukan kezaliman terhadap kepada orang kaya dengan mengenakan cukai yang berlebihan dan berat maka seseorang yang terkena zalim atau aninya itu bolehlah mintakkan harta yang dibayar kerana kezaliman itu sebagai zakat yang dikeluarkannya.”

Jika benar sangkaan kita ini maka adakah dengan tujuan kerana melepaskan tanggungan itu, as-Syed Ibrahim, telah mentamsilkan bahawa income tax yang telah dijalankan oleh kerajaan kita di Singapura ini sebagai suatu langkah yang zalim? Adakah zalim yang dikehendaki di dalam perkara ini umum juga kepada kerajaan yang bukan Islam? Dua soal ini sudah tentu akan senang dijawab oleh Tuan as-Syed Ibrahim sendiri tetapi menurut pendapatan kita bahawa yang demikian itu bukan pada tempatnya oleh kerana kita mengetahui bahawa di dalam undang-undang income tax yang berjalan hari ini bahawa orang-orang Islam diluluskan mengeluarkan zakat hartanya dan pengeluaran zakat harta itu adalah dikira sebagai suatu belanja yang mesti

yang dibangsakan kepada belanja yang tetap - bukannya sebagai hadiah yang akan dikenakan cukai pendapatan atasnya.

Telah memang teradat kepada manusia sememangnya tersangat sayang ia memberikan barang yang dikasihinya dengan tidak mengikut kehendak hatinya apalagi yang demikian itu datangnya daripada suatu perintah yang dijalankan, tetapi sebahagian daripada mereka itu tidak sayang mengeluarkan wangnya kepada barang yang hanya membukakan hatinya iaitu barang-barang yang tidak disuruh umpamanya mengeluarkan beberapa besar belanja pun memberi jamuan-jamuan yang tidak boleh disifatkan kepada sedekah apalagi kepada zakat itu.

Selain daripada itu cukai pendapatan itu diambil daripada keuntungan bersih yakni ditolak segala modal dan barang-barang yang ada yang dengannya sudah tentu berlainan sekali dengan keadaan zakat harta di dalam mana keadaan harta itu cukup setahun disimpan maka ia dikenakan zakatnya dengan tidak dikira lebih dahulu keuntungan yang bersih daripadanya. Dengan ini nyata sekali bahawa tidak ada satu hujah yang boleh dibawa bagi mengesahkan fikiran yang dikatakan dibawa oleh as-Syed Ibrahim. Memberi fikiran dengan sifatnya sebagai seorang dipandang ada berpengetahuan di dalam perkara agama di hadapan suatu majlis umum terutama dihadapan hartawan-hartawan Arab yang hadir di situ maka seolah-olah ia telah menggalakkkan golongannya itu membelakangkan tanggungan zakat yang pada setengah-setengahnya pun tiada begitu dijalankan oleh mereka itu

sekarang hendak dihilangkan sama sekali dengan diberi alasan oleh kerana telah membayar cukai pendapatan tadi. Yang demikian ini tidak akan dipercakapkan jika hanya dilakukan oleh dirinya sendiri sahaja tetapi oleh kerana diucapkan di majlis umum maka yang demikian bolehlah disifatkan ia menganjurkan suatu masalah yang berlawanan dengan dasar-dasar agama dan hakikat-hakikat yang dikehendaki dalam masalah yang berkenaan dengan zakat itu.

Masalah zakat ini sebenarnya ialah suatu masalah wajib pada mengeluarkannya dan ditetapkan pula bagi siapa menerimanya. Ia bertujuan untuk membaiki masyarakat orang-orang Islam terutamanya atas fakir dan miskin. Pada tahun kedua hijrah maka telah diturunkan ayat kepada Rasulullah (SAW) dan pada masa itulah dimulai memungut zakat yang pada masa itu dibahagikan atas semata-mata kepada dua farakat (fakir dan miskin). Yang demikian ini berjalan beberapa lamanya sehingga turun ayat yang keenam puluh daripada surah at-Taubah yang turun pada tahun yang kesembilan Hijrah menetapkan bahagian zakat itu kepada delapan bahagian yang termaklum. Tetapi sungguhpun demikian sesudah ayat itu diturunkan Rasullullah (SAW) tidak juga membahagikan penuh kepada delapan bahagian itu dan Rasulullah (SAW) mengutamakan pembahagian itu kepada suku-suku yang dipandang lebih mustahak menerimanya. Sebab inilah sebahagian besar daripada ulama menuntut bahawa sebelum selamat lagi fakir dan miskin itu di dalam kedudukannya maka selama itulah zakat

INSYA-ALLAH TERPELIHARA ANAK TUAN-TUAN DENGAN MEMAKAN:

Ubat Cacing Mahsyur Tabib Ahmad Khalid

49 LAHAT ROAD, IPOH PERAK

harta itu hendaklah diberikan semata-mata kepada fakir

miskin lebih dahulu daripada yang lain.

Dengan adanya amal-amal zakat yang telah menerima penguatkuasan kerajaan di dalam beberapa negeri di Semenanjung Tanah Melayu ini maka kita suka menarik perhatian mereka itu supaya memerhati kepada langkahan-langkahan Rasulullah (SAW) yang telah mengutamakan pembahagian zakat itu kepada fuqara' dan masakin dengan kerana ditujukan supaya mereka digalakkan membuat yang demikian itu supaya di belakang kelak mengeluarkan pula zakat untuk membantu masyarakat mereka sebab itu ditentukan bahawa pemberian zakat itu hendaklah sekira-kira boleh melaksanakan kepada beban mereka itu dengan kadar umurnya hingga 63 tahun dan dengan ini nyata dengan terangnya bahawa membahagi zakat dengan cara yang kita lakukan sekarang memberi 20 dan 30 sen kepada sebahagian daripada mereka itu bermakna menyalahi peraturan tadi terutamanya pula apabila mereka membahagikan itu dengan pukal borong iaitu dengan memberikannya kepada kanak-kanak, anak yatim yang bukannya termasuk kepada asnaf yang delapan itu.

Sungguhpun sebahagian kita telah menetapkan bahawa wang zakat itu digunakan kepada memantau pelajaran dan sebagainya oleh kerana fakir pelajaran lebih buruk keadaannya daripada fakir harta dan kemudian digunakan pula sebahagian daripada wang zakat itu kerana masjid dan lainnya tetapi janganlah kita lupa atau melupakan bahawa di dalam masa hidup Rasulullah (SAW) tidak sekali-kali melupakan kepada fakir dan miskin sebab yang demikian apabila tiap-tiap fakir dan miskin itu selamat maka selain daripada ia boleh diharap akan membantu kepada masyarakatnya tetapi juga akan menjauhkan kelemahan ekonomi orang Islam. Jadi sebagaimana yang telah dijalankan pada masa dahulu yakni membantu fuqara' dan masakin itu ialah melaksanakan mereka daripada terlingkung di dalam nama itu dan oleh itu sayogialah mengikut keadaan sekarang supaya kelemahan ekonomi orang Islam itu

diselenggarakan dengan mengadakan perusahaan-perusahaan yang boleh melepaskan

mereka itu.

Sebenarnya banyak lagi masalah-masalah yang patut disebut di dalam masalah zakat ini tetapi berhubung dengan masa berzakat telah luput maka insya-Allah jika hampir masanya kelak kita akan membanyakkan lagi di dalam perkara tanggungan-tanggungan ini dengan lebih jauh. Kita di sini hanya menulis ialah menjawab soal bagaimana seorang hartawan nampaknya telahpun mempelawa rakan-rakannya mencari "helah" untuk melepaskan zakat yang sayogianya ia sebagai seorang hartawan Islam patut berbuat sebaliknya lebih-lebih menggalakkan orang-orang menunaikan kehendak-kehendak zakat itu dengan mencukupkan contoh-contoh daripada dirinya sendiri.

Abu al-Mokhtar

KALAU ISTERI TUAN MENGANDUNG...

Kalau isteri tuan mengandung, jangan lupa ubat beranak "Cap Kambing Gurun" dengan menggunakan ubat ini tak payah berdiang - tak payah bersali. Harganya \$12.50 bersih.

Pos pesan kepada:-

YAHYA ARIFF

37, JALAN KANGSAR,

KUALA KANGSAR.